

民國二十五年

王樹榮等纂修

小湖王氏宗譜

四冊 十四卷

第

一

冊

卷

三三四

王氏族譜

公曆一九三六年
民國二十五年重修

檢其行篋則小湖一支譜系底稿竟不可得於是脩譜一事益散無有紀迨庚戌秋逸軒叔祖致仕旋里復詔樹榮曰續脩宗譜屢議屢輟若不及吾身與爾共事搜輯將來子姓必漫無稽攷矣遂親自探討於謝樓訪得忠烈公遺墓鳩工脩葺並改建宗祠旁述事齋爲忠烈公祠工既竣督同厚齋姪啓宗祠栗主錄其奉祀子姓及生卒年月日時以資攷訂三叔正之六叔敬之共同襄理並令諸孫分司繕寫樹榮時任江蘇法曹間一旋里叔祖必取搜攷所得詳悉指示及己巳秋歸道山而宗譜支派已朗若列眉矣間有未盡處六叔以衣食奔走於外二兒德馨在鄉行律師職務遂令同厚齋腴伯兩姪從事補訂越七年而歲事今年春六叔以宗譜稿見寄並貽書屬爲之序夫續脩宗譜之舉自先大父壬午旋里時倡議於今五十有五年中間屢經作輟若非逸軒叔祖以全力赴之必不克觀厥成故詳敘其顛末以見此事成敗之匪易俾後嗣子孫隨時脩輯以免失墜至吾家以謝姓改襲王氏應否復姓之辨及宗譜續脩有關敬宗睦族之誼原譜敘述已詳不復贅焉歲在丙子季春月中澣十五世孫樹榮謹序

勸孝篇

世有不孝子浮生空碌碌不念父母恩何殊生枯木百骸未成人十月居母腹渴飲母之血飢食母之肉兒身將欲生母身如殺戮父爲母悲辛妻對夫啼哭惟恐生產時身爲鬼眷屬一旦見兒面一命喜再續自是慈母心日夜勤撫鞠母臥溼簟席兒眠乾裯褥兒睡正安穩母不敢伸縮潛身在臭穢不暇思沐浴橫簪與倒冠那復修邊幅動步憂坑井舉足畏顛覆乳哺經三年汗血計幾斛辛苦萬千端年至十五六性氣漸剛強行止難拘束朋友外追遊酒色恣所欲日暮不歸家倚門至昏旭兒行千里程母心千里逐一娶得好妻魚水情和睦看母面如土視妻顏如玉母若責一言含嗔怒雙目妻或罵百端陪笑不爲辱母披舊裙衫妻著新羅縠不避人憎嫌不解人羞惡父母或鰥寡長夜守孤獨健或與一飯病則與一粥棄置在空房猶如客寄宿將爲泉下鬼命若風中燭快快至無常孤魂殯山谷魂靈在幽壤誰念纏桎梏纔得父母亡兄弟分財祿不識二親恩惟言我之福咸謂此等人不如禽與畜慈烏尙反哺羔羊猶跪足勸汝爲人子經書勤覽讀黃香夏扇枕冬預溫衾褥王祥臥寒冰孟宗泣枯竹郭巨尙埋兒丁蘭曾刻木如何今時人不學古風俗勿以不孝頭枉載人

間屋勿以不孝身枉著人衣服勿以不孝口枉食人五穀天地雖廣大不容忤逆族早早悔前非莫待天誅戮

予家向有宗祠未奉妣位配享余於母氏見背同弟瀛仙勉力構堂於祠之右追列累世祖妣及先妣神主爲春秋合祀計凡吾族中均許繼入此爲人子者當舉之事耳落成之日爰引勸孝歌一章書之匾額俾祭享時得以觸目警心非徒爲具文已也世世子孫其毋忽諸時乙未菊秋八世孫世傑謹誌

西泠沈禹揆書

謹按伯祖考西齋府君暨我祖考恕齋府君勗建右祠取唐王中書勸孝歌勝於後軒以訓後裔意深切矣茲併錄跋語刊於首帙使讀譜者開卷卽覩庶幾端本善則之一助云爾鑾謹識

王氏族譜目錄

卷之一

序文

凡例

原姓氏

遡來歷

復姓問附姓氏說

識遷移

卷之二

世系圖九

卷之三

世表一

卷之四

世表二之一

卷之五

世表二之二

卷之六

世表三之一

卷之七

世表三之二

卷之八

世表四之一

卷之九

世表四之二

卷之十

世傳一 續二

譜規

諭族文附遺言 家約

後跋

卷之十一

志 恩命附登科題名 復齋公召試大卷

卷之十二

議祠規附碑記 祝文 禮節單

卷之十三

繪塋域 附遺像 增祖塋續載 墓碑

卷之十四

紀祀產

例辭

一族譜翔于前明萬歷年間有凡例數則世系一圖世表一卷世傳數篇皆山陰沈山人越升手筆也沛陽公於天啓壬戌增葺多仍其文第分十二其于凡例世系世表世傳俱冠以級曰原姓氏等篇則別以春曰所謂新故不相掩者如此乾隆丙寅刊譜時以遺言詩文二卷漫漶散失不復編次故茲之所輯自凡例至諭族文綴以後跋悉依舊本凡級曰春曰字樣仍而弗削又取刊本附載之祠圖田數分隸以門增輯四卷敘於尾冊以備稽考焉

一沈山人敘譜意主復姓沛湯公著復姓問一篇明辨其義非但不必復實亦不當復也雍正癸丑暨乾隆初往四門往虞山徧加查訂余亦曾隨明遠兄至杭閱謝氏譜有景溫一支詳粵東族譜之語用心亦勤矣然述其本源俾知系出于陳留爲景滌公裔已耳丙寅刊本有謝氏世系數頁今闕之

一世系因萬歷本之圖分別宗支衍而爲九其說詳于本卷

一世表舊從歐體世經人緯頗爲詳晰其序次之旨著於凡例中茲推而闡之俾後之人知所繼述

焉宗人年及冠乃敘謂大書其名于祖禰之下也今以年十六爲率此繼世主鬯之義也 舊譜於世次之下分註高曾祖禰

重宗法也今仍之凡身繫四宗悉註勿遺間有不註者曰父在如十二支十世鉅曰祖在如八支十二世家新曰未除喪如八支家俊家元餘以例推至各支現已無後祠內主應祧者亦弗註

舊譜于支庶俱註支子不爲宗今於繼別及繼別子之次存以示例餘從省文又於仰梅公之次霽懷公廉生公之次止敬公註之以明先有繼爲後者即其親生嫡長亦以支論 凡繼嗣俱書

繼某後爲宗有立繼之後所後復自有子舊譜加註自幼終三年喪六字義極當表內凡三人行次宜以實紀查舊譜愛山支六世再從昆季尙以長幼均序七世可稽者僅九人餘則參錯傳

訛矣小湖之三支直沿至九世無服昆弟尙按齒排行是爲近古丙寅本有誤刊處悉已校正昔汜毓七世同居兒無常父料其長幼之序必無歧複可知今人分荆析爨各子其子宜甲乙之稱

無統及曾元者又有男女雜呼非禮經異長之義今之所註皆不沒其實所謂直書而美惡自見者也 遊庠者惟寄籍註邑名表中有歸安嘉興者是本邑則從省又墳塋隸他境者亦註邑名 記遷移其

子孫不複註歸宗則書復居 例曰書生忌起孝思也舊譜皆不註時仍之萬歷本不記妣生卒天啓本間有註妣生卒處丙寅刊本則無不註今擬壽母節婦悉存之其餘間從省略 生卒俱

註甲子唯康熙壬寅加註某年亦有不註者閱上下文義自明也 註享年以年五十爲始 翁

例不紀紀之者詳配耦之所自出或貴貴或尙賢也紀翁而止不得遠述祖曾 墳塋或註合塋或註別塋或註附塋于父塋之次皆以其實紀疑者闕之 紀壻例註名官爵則舉其重者從略

也 女以壻及子孫貴者註以受某號封贈其貞節受旌者亦詳註於表中 嗣續爲重有娶再醮之婦者或情勢不得已有子則存其姓此舊例也祠規又有主不皆祔之辨故婦自再醮來雖

註姓無礙嫁娶紀姓以別嫌所重者在註某之女耳 例曰殤子列名於其父位下如祠之祔主也並註某早卒不敘如無服之殤則不註

一舊譜一人一傳各系以贅今仿郡邑志志人物例統爲敘列仍舊題曰世傳如有專傳應紀者另列藝文續刊

一傳世輩行自十一世起以見善思齊樹德務滋爲序命名亦從此例

一此次修輯至乾隆庚子年止是年應載事實間就所知纂入餘錄添丁附記中

王氏族譜卷首終

王氏族譜卷之一

族譜前序

作史之要曰道法曰事詞道惟正法惟嚴事惟核詞惟當道不正則魏爲正統而蜀爲僭國弊而舛法不嚴則穿可行弑而盾可不出境弊而縱事不核則燭影斧聲千古莫決弊而誣詞不當則六月四日隱微不彰弊而晦故夫道法事詞史要也家乘何獨不然乘者載也所以載一族之人倫也以分則尊卑分以序則昭穆分以行則臧否分以遇則窮達分以壽則修短分而非正其道嚴其法詳審其事詞無以爲後勸懲奚貴此家乘爲歐蘇氏所以肅雍者譜牒修而宗法立也房杜氏所以頽敗者譜牒廢而宗法壞也我小湖北王一族爲廣威將軍青萍謝公裔其來歷具載篇中舊有復姓遺譜事實未詳規條缺略春將纂而修焉慮夫燕石亂玉魚目混珠也以姓質之高明達者曰唯唯否否錫姓於君而違之者非忠也受姓於祖而易之者非孝也宗法有以所知爲始祖者祖其所知之姓而於義當於心安矣孝思寧在復姓哉春於是姓仍其故而例增其新原姓氏也邇來歷也闡世系也所以推本始別宗支也而道綦正矣立譜規也讀諭文也述遺言也所以防邪僻示遵守也

而法綦嚴矣識遷移也敘世表也補世傳也錄詩文也所以悉履歷槩生平而昭文獻也事綦核詞綦當矣倣史氏之規模續祖宗之志事萃一族之精神標來裔之範圍庶家乘與國史同符宗風與國運並永豈不繼美歐蘇聲高房杜哉抑又計之謝可弗復也然而不可終泯也王可弗更也然而不可偏認也嘗觀晟溪閔栖梧黃同出一姓而分爲二二而未始不一時稱黃閔一族今春詳厥所由令後世知王謝一家而不存岐視此修譜意也至題之曰北王則以別於南王云時

天啓壬戌秋仲六世孫元春明初子頓首書於靜省居



王氏族譜序

嘗讀晉書及南史而歎王謝二族之在吳興郡者幾三十人其時烏衣子弟俱如瑤林玉樹茁于庭階何其盛也謝則陳留陽夏王則瑯琊臨沂世系秩然不紊未聞有合而爲一族者今愛山王氏其先本出會稽謝覽後覽仕梁吳興太守愛其風土清嘉遂家焉以姓名其里曰謝淩泊明初裔孫公權以避難始襲外舅姓遷居小湖再傳而雲崖君又贅於郡城吳侍御家其子孫世居愛山臺之右稱愛山王氏余覽其譜系自襲姓至今閱三百二十餘年傳世十二其本源歷歷可溯著在復姓間等篇詞醇義當蓋以示王與謝二族之分而實合俾後之人一體敦睦而婚姻百世不通則譜之繫於辨姓氏合族屬不綦重哉抑又聞謝氏名蹟之在吳興者不獨覽也晉文靖公爲太守時開塘於城西稱謝塘車騎將軍元宅在郡內相傳有車騎坊謝村以康樂得名其故宅捨爲福田寺又有別墅在烏戌之西林唐清晝亦自謂靈運十世孫其述祖德詩曰世運相承及我身風流自謂過世人吾且與王氏子孫共勵之矣時

雍正十有一年歲次癸丑立夏日

賜進士出身

勅授文林郎四川名山縣知縣南吳徐元禧頓首拜撰



重修族譜序

我王氏族譜自沛陽公釐定以來百有餘年簡帙頗多漫漶雍正癸丑族叔大來將繼而纂述焉偕
曜蒐輯考訂垂竣而叔賁志以歿事遂寢今年春族弟長發顧予而言曰家之有乘猶國之有史於
以萃渙合疏所繫綦重使度而弗修非唯先世嘉言懿行散軼罔紀卽族人存歿婚嫁一切應載事
實愈久愈湮繼志述事之謂何予應之曰然於是取癸丑鈔本重加校讐補其未備悉依沛陽公譜
稿體例編次手自繕寫以次就鈐自春徂秋厥工告蒧噫族之諸父伯兄能文者甚衆而獨以此事
委予予自顧嚮昧率爾操觚惟恐紕繆漏不足以闡前烈而式來茲而大來叔未竟之志於斯時
慰實亦曜之所竊幸焉雖然事有亟於修譜者如置義田以給族之不能養建義學以淑族之不能
教設義塚以收族之不能葬皆當次第舉行以廣仁孝之思而貽穀於無窮者也是重有望於吾族
樂善不倦之君子

乾隆十有一年丙寅冬十月十世曜孫謹識



重修族譜序

族之有譜蓋以紀一家之文獻信而有徵也譜之體近於史家紀傳有世系有世表有世傳綱舉目張犁然各當雖世彌遠屬彌疏而水源木本之思隱隱相維繫焉我族自前明初襲外舅姓而始迄於今三百七十餘年源遠而末益分藉非沛陽公經始於前先贈君偕明遠兄繼述於後則文殘獻缺之慨久而彌甚何以尋墜緒而修明之邪茲距刊譜之時又三紀余於家食燕間集舊藏鈔刻各本詳加參校釐爲十二卷其前八卷因丙寅刊本之舊間有訂正於世系表傳增所未載其後四卷則取譜牒中應載事實分隸以門一曰志

恩命二曰議祠規三曰繪塋域四曰紀祀產亦沿沛陽公體例各弁數言於卷端以明旨趣焉夫孝爲百行之原自仁率親等而上之至於祖其義一也顯揚之道人懷自勵廟所以妥神墓所以藏魄以時孝享服我先疇是皆願其傳之永永以爲裕後而光前者烏可以闕而弗錄乎剗剔旣竣仍大書以顏之曰王氏族譜族之爲言湊也欲其恩愛相流湊也譜之爲言普也欲其事行咸周普也第循其名而責其實俾人人知所謂族者如是所謂族譜者如是則孝弟之心油然而生矣強

爲善而恥流於頑不肖矣由是處則爲善士出則爲良臣讀譜者之觀感興起集益無窮又豈僅徵文考獻之迹云爾哉

乾隆四十有五年歲次庚子冬十有一月長至日十世孫鑾謹撰



凡例

級曰國史家乘例無二局宜核而精毋疏而酷紀實闕疑允稱信錄立凡例第一

一敘世必推始封之祖者著大宗也大宗既廢復推再遷之祖者明小宗也二宗既廢僅以所知爲祖者示不敢妄附也亦後世不得已之事噫宗系可少忽乎哉

一古者立宗法以教民睦重本也作譜者必於世次之下分註高曾祖禰以重祀典亦以維世教厚風俗也四宗之傳已盡而遞遷之者所謂祖遷於上宗易于下也

一敘世表必五世提爲一章更以五世起至九世蓋前章之終後章之始子姓雖多而不紊世系雖遠而可稽譜法也

一近代作譜多做歐蘇歐譜有字有官爵無生卒娶葬蘇譜有諱有官有娶有壽數有卒日無葬所無女夫今參而合之書行次序昭穆也書嫡庶存宗支也書字號備稽考也書行實昭有德也書官爵示光顯也書生忌起孝思也書嫁娶明氏族也書墳墓誌邱隴也考之未明者不敢牽合附會亦史闕文意也

一譜不必其事行周備差可備其世次者一切登錄以備一家之典故勤加修葺勿致遺忘無證據也。

一譜有銘美之義故宗賢之著者必加傳贊以揄揚之然必蓋棺論乃定生者不傳。

一宗支有犯先諱例當改易第其世遠人亡或策名仕版者姑存其舊現在有犯悉當擬正。

一族有敗壞風化玷辱門楣者法所應斥然惡止其身子若孫如克肖亢宗仍收入譜書某人之孫不忍以親故槩斥昔蔡叔廢而蔡仲仍封欒盈錮而欒書不絕遵此例也。

一宗男殒殤列其名於父位下者如祠之祔主也。

一宗人既紹人後而復書其名於所生下者示天親不可盡絕也。

一舊譜所載詩文爾雅及當世贈遺諸作不可恣意芟削錄之以存一家文獻。

一譜中係長白山人筆者稱級曰以別之餘皆出自春手新故不相掩也。

按長白山人姓沈名級字越升山陰人萬歷己丑聯雲芝田兩公叩之草創譜稿皆其手定向有敍一篇弁于首卷以意主復姓不錄

一譜必三十年一修蓋期至三十年則已故之行事恐泯急當續述後生之年庚未載亟當增加毋致遺忘而缺失也。

丙子歲重刊宗譜增訂凡例三條

一復齋公修譜時定見善思齊樹德務滋八字爲命名行次現已排至滋字擬續增因心則友能自得師八字以資繼續。

一舊譜定例須成丁者始得正載幼稚均入附記茲擬一律入正載以歸簡易

一舊譜列傳多出復齋公手筆遇諱字均空格今於各傳家諱均請丁少蘭姻長補填以便省覽

樹榮附識

原姓氏

春曰清寧既奠生齒日繁錫姓別族靡不有元遡流窮源以莫敢諼原姓氏第二

混闢匪人安成世界氏族不遡安識本原粵稽子生天丑生地遞二萬一千六百餘歲抵寅會而人乃生爾時蠢蠢蚩蚩奚殊蠕動焉識某某之爲誰閱世齒繁羲皇始正姓氏別倫類於是人各一姓姓各一族百千萬禩來雖分支別派而自出歷歷可稽如姬姜肇於水濱吳范仍夫國邑丁戴本乎稱諡張史昉於守官嚴席緣避諱而更明駱襲先名而著京陸定於推卜曾丙去其偏旁他如諱范爲朱改棘爲棗變理爲李易婁爲劉種種莫可殫述要非無本無源突生空桑也者疇鼻祖不自古初而曰某某也而族故某某也而族新新故分門起自叔季茂宏達人也亦曰人言王葛不言葛王與恢漫爭低昂而江左從風輒相矜以門第晉代著姓不乏而人倫冠冕則稱王謝問王奚昉爲周靈王太子晉後問謝奚昉申伯其先也申伯爲宣王元舅宣布德澤實楨榦周於是益封於謝子孫氏焉嗣後遺裔繁衍蕃置海內將與天壤相敵而王之爲王謝之爲謝疇外所自而別出一派者譬之山泰華培塿臚列不可指數總發脈於崑崙譬之水河流九派注瀉靡有盡藏總發源於星宿世

遠則族疎族散則系絕不亦失義皇正姓意哉予用是懼而原其姓所自出令百世後知居不同里氏無二宗羅碁置者爲一局而族屬雖疎系不終絕庶幾維風一助云爾。

邇來歷

春曰分疆列郡氏族續紛其出有自而來有因由今邇昔統系昭存邇來歷第三。

吳中以王表著者不下數十族而小湖居其一小湖與諸族疇非本太子晉而閱世遼邈系莫可稽不得不推中葉以紀根宗小湖之有王氏蓋自會稽來也會稽諸王簪裾滿朝譽望滿世而拄頰看青山乘雪訪安道子猷之風遠矣今之列屋而居里南者派所自來也然則曷爲而世於吳曰隋開皇間有諱森者避讐渡江而北潛洞庭之東山故東山非與會稽別也又曷爲而來小湖曰宋紹興間有諱輪者經營四方苦洪濤爲阻於是卜居小湖之原故小湖亦非與洞庭別也而輪之兄輒則由洞庭而徙雉城傳廉憲公瑄其裔孫也其弟軾又由長興贅居菱湖傳憲副公繼祀一脈荆分三方鼎立故長興菱湖又非與我小湖別也輪十有一傳爲霞軒君永家累千金而子幼且病慮堂前之燕飛入他家計擇女夫理家政於是贅我青萍公季子公權青萍故出會稽謝覽後覽仕梁爲吳興太守以吳興土沃民淳宜長子孫遂留家焉湖濱之有謝氏自此始丁我朝洪武初青萍以武功授指揮使守滁州靖難兵起抗節以殉其時朝廷方籍衡命者家公權遂諱謝襲外家姓以小湖爲

士著嗣後王氏式微而公權子孫殷繁振發彬彬多文學士矣公權舉子三曰士忠曰士傑曰士敬忠贅叔子珩于郡城吳侍御家遂居府治之西稱愛山臺王而傑之曾孫爲我先君聯雲公天資穎異倜儻有大志恨早孤不得自邁嘗歎曰我先世冠江左而今淪落乃爾乎安在其爲亢宗于是銳然訓春補弟子員春亦仰承父志以苦心力學爲家訓謂不發于身必發于子孫歲乙卯長子尙行以鄉薦報季子尙賓繼列青衿則家訓之明驗也而族之敦詩書陳俎豆者繩繩未艾說者謂世德相承發祥必厚江左冠裳可卜于此云春慮世遠則族疎族散則系絕後乃有貧南富北而情替于犢禪縫布春粟而心殘于煮豆諱姬駕子而穢彰于陳劉頂圓履方空號丈夫子不幾爲王氏之窮奇乎哉用是邇其來歷令後代知王與謝同宗吳興與會稽同系雖渙若萃雖疏若親雖數百里而遙不異同鄉共井敦睦一念隱隱若元氣流通則藉有茲邇在睹來歷者弗狃小湖一族以局吾見

復姓問

春曰姓以明統或緣事更有復而正有因而仍罔敢任臆爰質高明復姓問第四

小湖北王一族系出謝淩謝氏自洪武間有諱公權者贅於王值父廣威將軍青萍公殉國難窮治無辜因諱謝稱王子若孫仍焉七傳茂才元春慮不早計是莒子之繼鄒也韓兒之嗣賈也少伯之託于朱張祿之諱夫范也悵然有首邱思叩予而請予籌之曰君之有是問也慮亂宗也意深遠矣雖然何見之不廣哉人生父天母地戴髮含齒者誰非同胞故曰四海之內皆兄弟自黃帝錫姓命氏于是同出也而虞姚夏姒殷子周姬不復祖軒轅姓卽仲尼殷人也而嘉父後世之稱孔不易也如婁敬賜劉而劉徐勣賜李而李我朝黔國公賜沐而沐不聞子孫拘拘焉故姓是復也尊王命也君族仍外家姓二百餘年傳世已七葉受姓于祖與受姓于君奚以異如必謝之爲是而王之爲非得毋居己于是居祖父于俱非乎安在其爲順孫且余稽之往牒謝氏出自申伯而申伯實神農後姜姓必欲邇而窮之則還而復謝未已也將還而爲申爲姜不亦迂且遠哉大抵人必有所自始始祖爲族所宗然有肇封之始祖有筮仕之始祖有播遷之始祖君家小湖一派自公權始則公權

實爾始祖而王則始祖所命之姓也奕葉繁茂子孫發祥靡不由此而奚謝之爲君何見之不廣哉
元春于是唯唯而退姓如初

賜進士出身光祿寺少卿奉勅審錄福建等處通家弟王德坤時簡甫拜撰



變曰余讀族譜復姓問等篇而於別嫌明微之道三致意焉禮不娶同姓傳曰男女同姓其生不蕃
古者男氏女姓以別婚姻氏同姓異者婚姻可通姓同氏異者婚姻不可通原夫得姓受氏之始
本自多岐觀夾漈鄭氏氏族略所列王氏凡四姬姓者爲太原瑯琊其他姓三王氏則爲北海陳留
汲郡河南馮翊諸郡浸假此三王氏者與姬姓之王爲婚可也烏程小湖王氏傳聞系出太原爲姬
姓而吾北王一族乃謝景滌公之裔於前明襲外舅姓而始溯其本原蓋姜姓也浸假吾王氏與姬
姓之南王世爲婚可也難之者曰今之人皆以氏爲姓矣使王與王爲婚凡納采問名通簡啓彼曰
太原此曰瑯琊不以駭俗爲嫌乎應之曰江左以門第相誇非著姓望族世幾不齒莫與爲婚弊之
所漸保無有以質混真者今之沿襲故事遠徵郡名凡氏王者不曰太原卽曰瑯琊亦絕無稱北海
陳留等名者叩其世系則知禰耳知祖耳知曾與高耳上而溯高之禰及祖或有茫然無以對者而
猶稱太原稱瑯琊如故不亦誣且瀆乎吾王氏譜牒班班可考沛陽公會題北王以別於南王追遡
來歷詳述於篇然則謝固不必復也王亦不容混也能矯積習勿援古郡否則從俗以爲禮稱陳留
可也稱陳留以存謝也卽以別王也用綴蠡說於簡末以竣後之君子相與考證云爾